

# KEREKE YA LUTERE MO BORWA JWA AFRIKA

54/2015 Thero ka moletlo wa ntšhwafatso ya kereke, e le ka 01. 11. 2015

## **Mo leineng la Modimo o e leng Rara le Morwa le Mowa o o Boitshepo**

Lefoko le le okamelang letsatsi le le kwadilwe mo go 1 Bakor. 3:11, le re: **"Gonne ga go na ope yo o ka thayang mothao o mongwe, fa e se ona fela o o thailweng, e bong Jesu Keresete."**

1. Sefela sa 186 - 172/179

**2. Thapelo:** Morena, Modimo, Rara yo o mo legodimong, re a leboga, gonne kajeno o re gopotsa sešwa ka tiro e kgolo ya gago ya go tsoseletsa motlhanka wa gago, e bong Martin Luther gore Lefoko la gago le le neng la khurumelediwa mo tlase ga ditshokamo tse dintsi le loodiwe, le dirwe bogale, le mele sešwa, le utlwale sešwa mo kerekeng ya gago, le loodiwe gore e nne tšhaka e e bogale sešwa, e nne petlwane e e nonofileng go tthagola mofero otlhe o o bosula, peo ya Lefoko la gago e mele, e gole sentle, gore go ikanngwe Efangele ya ga Jesu Keresete, go se itsietse ope ka go gopola gore re ka dira sengwe go tshegofadiwa ke wena, mme re ikanye ka tlhomamo, fa re lesego la gago le tla mo go rona ka go tshegofadiwa ke wena ka ntlha ya bopelotlhomogi jwa gago jo bo mo go Jesu Keresete, Lefoko la gago le ungwe maungo a go tlabologa, a go dumela, a lorato le tsholofelo. Morena, a o ko o re thuse gore le mo gare ga rona Lefoko la gago e nne le le looditsweng, le nne bogale, le mele sešwa, le dire tiro ya lona ka go tlosa maleo le melato ya rona, le ungwe maungo a go ikwatlhaela maleo a rona, a go dumela boitshwarelo mo leineng la gago, maungo a go dira ditiro tsa lorato. Tseo re di kopa ka ntlha ya bopelotlhomogi jwa gago jo bo leng teng ka metlha ka ene Jesu Keresete Morwao, Morena, Morepholosi. Amen.

3. Lefoko la Testamente e kgologolo le kwadilwe mo go Jes. 62:6-17;

Epistolo ka fa thulaganyong ya 2 e kwadilwe mo go Baroma 3:21-28;

Efangele ka fa thulaganyong ya 3 e kwadilwe mo go Matheo 10:26(b)-33.

4. A go ipolelwe tumelo ya bokeresete!

5. Sefela sa 183 - 169/-

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 5:1-12, e re: "E rile (Jesu) a bona bontsintsi, a tlihatlogela kwa thabeng; ya re a sena go nna fa fatshe, barutwa ba gagwe ba tla go ene. A tumolola molomo, a ba ruta a re: 'Go sego ba ba humanegileng mo moweng; gonne puso ya magodimo ke ya bone. Go sego ba ba hutsafetseng; gonne ba tla gomodiwa. Go sego ba ba pelonolo; gonne ba tla rua boswa jwa lefatshe. Go sego ba ba nang le tlala ya tshiamo, ba e nyorelwa; gonne ba tla kgorisiwa. Go sego ba ba kutlwelobotlhoko; gonne ba tla utlwelwa botlhoko. Go sego ba ba pelo di itshekileng; gonne ba tla bona Modimo. Go sego badira-kagiso; gonne ba tla bidiwa bana ba Modimo. Go sego ba ba bogisediawang tshiamo; gonne puso ya magodimo ke ya bone. Lo sego, fa batho ba lo kgoba, ba lo bogisa, ba bua bosula jotlhe ka ga lona ka maaka, ka ntlha ya me. Itumeleng lo ipele; gonne tuelo ya lona e kgolo kwa magodimong. Gonne ba bogisitse baprorofeti jalo, ba ba neng ba le teng pele ga lona.'" Amen.

**8. Thero:** Barategi mo Moreneng wa rona Jesu Keresete, kajeno re dira moletlo wa ntšhwafatso ya kereke. Ka Sezulu moletlo ono o bidiwa moletlo wa go loodiwa ga kereke. Ke re: Ba ba theileng moletlo oo leina leo ba dirile sentle. Ka leina leo go utlwala sentle tse di diragetseng mo sebakeng sa ntšhwafatso ya kereke. Ga loodiwa tšhaka ya Lefoko la Modimo. Lefoko la bowa la tshela, la nonofa sešwa, la nna bogale, la tlhaba tota, la nna petlwane e e looditsweng tota, tshimo ya Modimo e lengwe sentle, peo ya Lefoko la Modimo e mele sentle, mefero e tlhagolwe sentle, go tlhage maungo tota, batho ba utlwa sešwa se se rewang ke Lefoko la Modimo, ba utlwa sešwa gore go rewang tota ka mafoko a Efangele eno e e rulaganyeditsweng moletlo wa ntšhwafatso ya kereke. Re itshwarelele mo boammaaruring jo bogolo gore ga re tshegofadiwe ka go dira ditiro tse di umakiwang ka mafoko a masego, mme re kgona go di dira, tse di phawulwang, fa e le ba lesego, ka go tshegofadiwa ka ntlha ya bopelotlhomogi jo bo mo go Keresete Jesu.

Kana go ne go tlwaelegile gore go tsenngwe megopolo e mentsi mo mafokong ao. Ga tlhaga ditshokamo tse dintsi. Le kajeno go sa ntse go na le ba le bantsi ba ba kopanyang mafoko ao a a buang ka ga ditshegofatso tsa ga Keresete le megopolo

ya bone e e sa tsamaelaneng le tse di boletsweng ke Keresete ka mafoko ao. Mafoko ao ka tlwaelo a kopanngwa le tsa lefatshe, a kopanngwa le tsa puso ya mo lefatsheng, le fa a raya tsa puso ya legodimo, a raya tsa puso ya Modimo. Ka mokgwa oo mafoko ao a latlhegelwa ke bogale jwa ona, ke a a sa tiholeng a tihaba, ke a a sa tiholeng a dira tiro ya ona tota. Ka moo a Morena a re thuse gore go loodiwe tšhaka ya Lefoko leo la Modimo, re tihaloganye tota gore Jesu o raya eng, fa a bua ka ga lesego le barutwa ba gagwe ba tshegofadiwang ka lona. A go utlwale go tloga mo tshimologong gore Jesu o ne a lebisa mafoko a ditshegofatso go barutwa ba gagwe. O ne a sa raye ba bangwe, a raya barutwa ba gagwe. Le mo ngwageng wa kajeno o sa ntse a raya bone ba ba dumelang mo go ene, ba ba mo salang morago. Ke bone ba ba tshegofadiwang. Kwa ntle ga Keresete, kwa ntle ga tumelo ya go dumela mo go ene, kwa ntle ga go sala Jesu morago, motho, le fa e le mang o sa ntse a le ka fa tlase ga thogako le khutso. Lefoko la Efangele eno e utlwala sentle ka go supa gore **ba ba sego, ba ba tshegofaditsweng ke bone**

1. ba ba ipolelang gore ba tlhoka thuso ya ga Jesu Keresete;
2. ba ba mo go ene ka tsotlhe tse ba e leng tsona;
3. ba ba bogisiwang ka ntlha ya leina la gagwe.

1. Ba ba sego, ba ba tshegofaditsweng ke **bone ba ba ipolelang gore ba tlhoka thuso ya ga Jesu Keresete**. Lefoko le re: "Go sego ba ba humanegileng mo moweng; gonne puso ya magodimo ke ya bone. Go sego ba ba hutsafetseng; gonne ba tla gomodiwa. Go sego ba ba nang le tlala ya tshiamo, ba e nyorelwa; gonne ba tla kgorisiwa." Ka mafoko ao a ga Jesu ga go rewe khumanego fela, ga go rewe khutsafalo ya go hutsafala fela. Ga go rewe selelo sa go ngongorega fela. Ga go rewe go bolawa ke tlala le lenyora fela. Ka mafoko ao go rewa khumanego e e mo moweng, le khutsafalo ya go hutsafalela maleo, le go lelela thuso e e tswang mo go Keresete, le tlala ya tshiamo, le go nyorelwa tshiamo e e leng yona e e tswang mo go Keresete. Go rewa batho ba ba ipolelang tota gore ke bahumanegi ba ba sa ka keng ba duela melato ya bone fa pele ga Modimo, ba tlhoka thuso ya ga Keresete gore ene a ba lefele melato ya bone. Go rewa batho ba ba itseng gore ba mo botennye jo bo boteng tota, ke ba ba itseng gore ga ba na thata ka bobone go intsha mo botennye joo, ke ba ba goelang mo go Jesu gore a ba ntshe mo go jona.

Go rewa batho ba ba ipolelang gore ba tlhoka tshiamo ya nnete fa pele ga Modimo, ba na le tlaa ya tshiamo, ba nyorelwa yona. Ke bone ba ba gomodiwang ka mafoko a kajeno gore ba se ka ba lapa, ba se latlhe tsholofelo, mme ba itse gore ba baakanyeditswe manno mo pusong ya Modimo, e se ka gouta, le e seng ka selefera, mme e le ka madi a ga Jesu Keresete, ka dipogo le loso lwa gagwe. Puso ya legodimo ke ya bone. Ba gomodiwa mo khutsafalong ya bone ka kuelo e ntle ya gore ba itshwaretswe maleo ka ntlha ya ga Keresete. Ba kgorisiwa ka go balelwa tshiamo ya ga Keresete. Ke ba ba tshegofaditsweng ka tsela e Keresete a tshegofatsang ka yona mo go kalo, fa ditshegofatso tsotlhe tseo di ka diragala ka ntlha ya go tshegofadiwa ka bopelotlhomogi le boitshwarelo jwa Modimo jo bo mo go Keresete Jesu, ga di diragale ka go di dira gore ba tshegofadiwe.

2. Ba ba sego ka go tshegofadiwa ka ntlha ya tsolofetso ya ga Keresete ke **bone ba ba mo go ene ka tsotlhe tse ba e leng tsona**. Ke ba ba pelonolo, ba ba kutlwelobotlhoko, ba ba pelo di itshekileng, badira-kagiso. Ba ithutile mo go Jesu, ba mo sala morago, ba pelonolo jaaka ene, ba kutlwelobotlhoko jaaka ene, ba pelo di itshekileng jaaka ene, ba dira kagiso jaaka ene. Ga ba dirise pelonolo ya lefatshe, gongwe kutlwelobotlhoko ya lefatshe. Ga ba foufatse matlho a bone fela, ga ba didimale fela, fa ba bona morwaarraabo, gongwe morwadierraabo, gongwe ngwana wa bone a tsamaya mo tseleng e e bosula. Ba tla bua le ene ka pelonolo yotlhe, mme e bile ka tsela e e utlwalang tota gore yo o tsamayang mo tseleng e e bosula a lemoge gore o mo tseleng e e yang mo moleteng wa molelo, mo tatlhegong e e sa khutleng, yo mongwe a utlwe sentle, a be a ikwatlhaele maleo a gagwe, a tlihabologe, a utlwe le ka ga pholoso e e bonalang mo go Jesu gore a itshwarelwe maleo a gagwe. Ke pelonolo e e ntseng jang, ke kutlwelobotlhoko e e ntseng jang, fa o bona yo mongwe a le mo tseleng e e yang mo tatlhegong, o sa mo tlihasetse kotsi eo? Ba tshegofaditswe ke Keresete bone ba ba sa lekeng go itshekisa, le e seng go tlosa melato ka tsela ya lefatshe, ba ba sa lekeng go dira kagiso ya tsela ya lefatshe, ba ba sa lekeng go pateletsa batho go phimola melato ka ditefa tse di rileng, gongwe ka go tlihaba sengwe. Go tshegofaditswe ba ba tiisang gore melato ya bone e phimotswe fela ka madi a ga Jesu Keresete fa pele ga Modimo, ba ba tiisang gore le fa gare ga batho go agisanngwa ka kagisanyo ya nnete ka tsela ya ga Keresete fela kwa batho ba itshwarelanang teng. Ke yona tsela ya ga Keresete ya go

agisanya tota, go ruana, le go letlana le Modimo ka ntlha ya ga Keresete, go ruana, le go letlana le batho ba bangwe ka go itshwarelana ka lorato lo lo bipang bontsi jwa boleo. Ka tsela eo bone ba ba mo go Keresete ba dirisa tsela ya ga Jesu ka pelonolo ya nnete, ka kutlwelobotlhoko ya nnete, ba itshekisiwa mo maleong a bone ka go itshwarelwa ke Keresete, ba agisanya le ba bangwe ka go itshwarelana mo leineng la ga Keresete. Tsotlhe tseo di diragala, fa modumedi a tshegofadiwa ke Keresete go di dira.

3. Ba ba tshegofaditsweng jalo ke Keresete a ba se ka ba gakgamala, mme ba itumele, le fa ba bogisiwa ka ntlha ya leina la gagwe. Ba ba sego, ba ba tshegofaditsweng ke **bone ba ba bogisiwang ka ntlha ya leina la gagwe, "ka ntlha ya tshiamo,** gonne puso ya magodimo ke ya bone. Lo sego, fa batho ba lo kgoba, ba lo bogisa, ba bua bosula jotlhe ka ga lona ka maaka, ka ntlha ya me. Itumeleng lo ipele; gonne tuelo ya lona e kgolo kwa magodimong. Gonne ba bogisitse baprorofeti jalo, ba ba neng ba le teng pele ga lona." Go a itsiwe gore go ntse jalo. Ka ntlha ya ga Keresete re abetswe go bogisiwa, e seng go dumela fela mo go ene, Bafil. 1:29. "Re tshwanetse go tsena mo pusong ya Modimo ka ditlalelo di le dintsi," Dit. 14:22. A re se ka ra itshwenyegela mo ditlalelong, "ka re itse gore tsona dipogiso tseo di dirafalela bakaulengwe ba rona ba ba mo lefatsheng," 1 Pet. 5:9. A go itsiwe gore re a bogisiwa, re tsongwa ka ntlha ya tshiamo, ka ntlha ya ga Keresete. A go gopolwe gore fa ba bangwe ba bua se se bosula ka ga rona, ke tshwanelo gore ba bue maaka. Fa ba bua boammaaruri ka go bua se se bosula ka ga rona, ga se lesego, ga se tshegofatso. Fa ba re tsoma, ba re tshwara ka ntlha ya go dira bosula, ga se lesego. Ke se se lebosegang, ke bopelotlhomogi, ke lesego fela, fa re bogisiwa ka ntlha ya tshiamo, fa ba re tsoma, fa ba re bogisa, jaaka ba bogisitse baporofeti ba Modimo ba ba neng ba le teng pele ga rona, ke raya baporofeti ba ba neng ba rera Lefoko la Modimo tota. Ke potso e e tshwanetseng, fa go bodiwa gore ke tumiso e e ntseng jang, fa re itshokela petso kwa re leofetseng teng? Mme fa re itshokela matshwenyego kwa re dirileng molemo teng, fa re bogisiwa ka ntlha ya tse di molemo, go lebosega fa pele ga Modimo, ke bopelotlhomogi mo go ona, ke lebaka la gore re itumele, re itse gore re ba ba tshegofaditsweng ke Keresete ka ntlha ya bopelotlhomogi jwa gagwe, e seng ka ntlha ya tse re di dirileng, gongwe ka ntlha ya tse re di diretsweng. Go nna

bahumanegi fela, go nna pelonolo fela, go bogisiwa fela ga se lesego le le rewang ke Keresete. Re ba ba sego ka lesego le e leng lona fela, fa re ipolela gore re tlhoka thuso ya ga Jesu Keresete, fa re le mo go ene ka tsotlhe tse re leng tsona, fa re bogisiwa ka ntlha ya leina la gagwe. Amen.

**9. Thapelo:** Morena Modimo Rara yo o mo legodimong, re a leboga, re lebogela Lefoko la gago. A o ko o re thuse gore re tlhaloganye gore go tshegofadiwa ka tshegofatso ya nnete ke go reng. Re gopole ka metlha gore rona batho ba re leng baleofi rotlhe ga re ka ke ra ipaakanyetsa lesego ka borona, re gopole gore re baakanyediwa lesego ke wena ka bopelotlhomogi jwa gago ka ntlha ya ga Keresete, le fa e le masego a a kwa ntle, a mmele, le fa e le masego a mo teng, a semowa. Masego otlhe a tswa mo go wena. Morena, re leboga ka ntlha ya ga Morwao Jesu Keresete Morena Mopholosi wa rona. Amen. Thapelo ya Morena: Rara wa rona yo o mo legodimong ...

#### 10. Sefela sa 202 - 187/195

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke EAW Weber DD, ka ngwaga wa 1994,2003/2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.